

Naalagaaffiit Peqatigiit Innarluutilinnut isumaqatigiissutaata atortuulersinneqarneranut aatillugu ussersornermik atuisut, innuttaasullu allat attaveqarniarnerminni ajornartorsiutillit isumaqatigiissummut ilaatinneqartut, nakorsiarneranni malitseqartitsinermut kiisalu nangittumik katsorsarneqarnerannut atatillugu allakkatigut nassuiaammik tiguisalernissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.

Akissuteqaat

(Peqqissutsimut Naalakkersuisoq, Agathe Fontain)

Aappassaaneerpeqarnera

Naalakkersuisut sinnerlugit Ilaqutariinnermut Peqqissutsimullu ataatsimiititaliap isumaliutissiisuutaanut qujavunga. Naalakkersuisut nuannaarutigaaq suliaassaqarfimmi ineriartorneq aammalu suliniutit aallartinneqartut ataatsimiititaliap iluarisimaarlugu oqariartuutigimmagu.

Pingaartumik Naalakkersuisut immikkut maluginiarpaa ataatsimiititaliaq isumaqarmat nunatsinni peqqinnissaqarfimmi ingerlaavartumik naleqqussaaneq aammalu innarluutillit pillugit isumaqatigiissutip atuutilersinneqarnissaa eqqarsaatigalugu pisussaaffinnik ineriartortitsiuarnissaq napparsimasut isumannaatsumik sullinneqarnissaannik nukittorsaanissap pitsanngorsarnissaa aammalu tamatumani ineriartornissamut periarfissat atorluarnissaat eqqarsaatigalugu ingerlaavartuusariaqarneri.

Ullumikkut peqqinnissaqarfik peqqinnissakkut sullissisut napparsimasullu akornanni attaveqarnermi paatsooqatigiinnginnissaq anguniarlugu isumannaarniarlugu arlalitsigut iliuuseqarpoq. Peqqinnissaqarfiup napparsimasullu akornanni attaveqatigiinneq pitsanngorsarniarlugu suliniutiginiarpaa. Taamaaliornikkut pisariaqartitsineq naapertorlugu naleqqussarnissamut Innarluutillit isumaqatigiissutaanni pitsaassutsit piumaneqartut eqqortinneqarsinnaaqqullugit.

Siullermeerpeqarnerani Naalakkersuisut oqaatigeriigaattut peqqinnissaqarfimmi ussersorluni nutserisunik atorfinitsitsinissamik pisariaqartitsisoqarnerisooq, imaluunniit sulisunik aalaakkaasunik pikkorissaasoqassanersooq misissussavaat.

Naalakkersuisut peqqinnissaqarfimmi misigisat pitsaanerulernissaat anguniarlugu siunnersuut pitsaasutut isigaat.

Taamatut oqaaseqarlunga siunnersuut Inatsisartuni kajumissusilimmik oqaluuserisassatut ingerlateqqippara.